

Reykjavík 29. nóvember 2013

Nefndasvið Alþingis
Austurstræti 8-10
150 Reykjavík

**Umsögn Barnaheilla - Save the Children á Íslandi um tillögu til þingsályktunar
um skráningu upplýsinga um umgengnisforeldra.**

**143. löggjafarþing 2013–2014.
Þingskjal 71 — 71. mál.**

Barnaheill - Save the Children á Íslandi styðja þingsályktunartillögu um að teknar verði saman upplýsingar um umgengnisforeldra. Samtökin telja að ekki sé nóg að að taka saman þær upplýsingar sem tilgreindar eru í greinargerðinni, heldur þurfi að fara fram heildarúttekt og þar með endurskoðun á stöðu barna sem fara í umgengni hjá öðru foreldri en þau eiga lögheimili hjá. Þar með sé gerð heildarendurskoðun á öllu því sem varðar búsetu, meðlag, umgengni, fjárhagsstuðning, skattaumhverfi, tryggingum, ábyrgð og skyldum foreldra gagnvart börnum sínum. Mikilvægt er að réttindi og skyldur séu í samræmi við raunveruleikann. Lagaumhverfi hvað varðar meðlag, skatta og stuðning samfélagsins við foreldra hefur lítið breyst í áratugi. Á sama tíma hefur starfsumhverfi foreldra, atvinnuþátttaka og þátttaka þeirra í umönnun og uppeldi barna sinna breyst mikið. Réttarstaða foreldra og þar með barna þeirra er ekki í samræmi við það. Samtökin telja mjög mikilvægt að réttarstaða þessa hóps, sem um ræðir í þingsályktunartillögunni og greinargerðinni, verði bætt. Til þess þarf heildarúttekt og heildarendurskoðun. Slíkt er löngu tímabært.

Samtökin taka undir þau rök sem tilgreind eru í greinargerðinni og telja það algjörlega ótækt að í íslenskri hagskýrslugerð séu umgengnisforeldrar skráðir sem barnlausir, þar sem stór hluti þeirra eru mjög virkir uppalandur barna sinna og standa straum af kostnaði við uppeldi og umönnun án þess að tekið sé tillit til þess af hálfu hins opinbera. Með því er þeim börnum mismunað sem búa á tveimur heimilum.

Barnaheill - Save the Children á Íslandi leggja áherslu á að við mótun nýrrar fjölskyldustefnu á vegum Velferðarráðuneytisins verði réttindi barna höfð að leiðarljósi og ekki skuli mismuna börnum eða foreldrum þeirra eftir stöðu þeirra eða búsetuformi.

Í þingsályktunartillögunni er gert ráð fyrir að skráning upplýsinga hefjist eigi síðar en 1. janúar 2015. Barnaheill - Save the Children á Íslandi leggja til að vinnu við heildarúttekt á stöðu barna sem búa á tveimur heimilum og foreldra þeirra og þar með skráning upplýsinga, hefjist sem allra fyrst og eigi síðar en á vormánuðum 2014.

Barnaheill - Save the Children á Íslandi leggja áherslu á þá grundvallarreglu barnaréttarins og Barnasáttmála Sameinuðu þjóðanna að ávallt beri að hafa hag og þarfir barnsins að leiðarljósi þegar málefni þess eru ráðin, sama hver þau eru og ekki skuli mismuna börnum vegna stöðu þeirra eða foreldra þeirra.

Virðingarfyllt

f.h. Barnaheilla - Save the Children á Íslandi

Erna Reynisdóttir
framkvæmdastjóri